

清

史

稿

清史稿

列傳

循吏

清初以武功定天下日不暇給世祖親政始課吏治詔嚴舉劾樹之風聲聖祖平定三藩之後與民休息拔擢廉吏如于成龍彭鵬陳瓊郭琇趙申喬陳鵬年等皆由縣令洊歷部院封疆治理蒸蒸日上爲盛世宗綜覈名實人知奉法乾隆初政循而勿失國家豐亨豫大之休蓋數十年吏治修明之效也及後權相用事政以賄成盜國病民亂萌以作仁宗矯之冀滌瑕穢道咸以來軍事興而吏治疏同治中興疆吏賢者猶能激揚清濁以彌縫其間然保舉冒濫捐例大開猥雜不易爬梳末造財政紊亂新令繁興簿書期會救過之不遑又遷調不時雖有潔己愛民者亦不易自舉其職論者謂有清一代治民寬而治吏嚴其敝也奉行故事實政不修吏道媮而民生益蹙迨紀綱漸隳康雍澄清之治邈焉不可見觀此誠得失之林也明史所載以官至監司爲限今從之尤以親民爲重其非由守令起家者不與焉

循吏一

白登明

歸安州子宗堯

任長日

宋必達

陸存新

張沐

項理

陳汝咸

繆燧

陳時臨

姚文燮

黃貞顯

駱鍾麟

臨宗多

順德明

趙吉士

張瑤

江皋

張克毅

寶號

邵嗣堯

新立鼎

高唐府

崔華

周中微

劉榮

陶元淳

廖冀亨

佟國瓚

陸師

黃鑑

白登明字林九奉天蓋平人隸漢軍鑲白旗順治二年拔貢五年授河南柘城知縣時大兵之後所在萑苻嘯聚登明治尙嚴肅禽諸盜魁按以法境內晏然憫遺黎荒殘多方招撫停止增派河夫設條以勸耕讀十年考最擢江南太倉

知州釐賦稅除耗羨雪諸冤獄訪察利弊所摘發輒中隣境有冤抑赴愬上官輒願下州爲理海濱居民因亂蕩析登明召民開墾復成聚落是年九月海寇犯劉河堡登明盡力守禦寇不得逞遂退十六年海寇破鎮江由江甯敗走急攻崇明巡撫蔣國柱治兵策應欲遣告師期莫敢前登明獨駕一艘夜半往繼城入衆知援至守益力寇乃遁劉河北支有朱涇者宋范仲淹新塘遺跡也久淤塞登明請於上官疏鑿五十里巡按李森先知其能復令大開劉河六十里於是震澤在北諸水悉導入海旱潦有備爲一郡利先是寇急時需饟無出以雲南協餉應之卒爲大吏所劾落職州民列治狀請留弗得坐廢二十餘年康熙十八年會臺灣用兵福建總督姚啓聖巡撫吳興祚素知登明代爲入貨疏薦起授高郵知州值歲旱蝗繼而大水湖漲決清水潭築隄禦之嚴禁胥吏尅減役者踴躍從事次年復災再請蠲賑勸富民分食全活無算時三藩初平軍檄猶繁登明與民約凡供億驛夫聞吹笳而至免奪民時上官有所徵調不輕給然皆諒其清廉亦無相督過者以積勞卒官貧無餘資州人醵金以殮入祀

名宦祠鄉民多肖像立祠私祀焉時江南以良吏稱者湯家相任辰旦于宗堯皆與登明相先後云家相字泰瞻山西趙城人順治六年進士八年授常熟知縣潔己愛民釐剔耗蠹撫恤凋殘善政具舉前令被劾逮問家相左右之力白其誣以是忤巡按御史時江南通賦數百萬嚴旨奪各官職家相坐免士民爭先輸納不踰宿而額足且以治狀訴大吏請留勿獲既而給事中周之桂疏上其事十三年起授湖北南漳縣縣居萬山中寇盜窟穴時出肆掠戕官人成危之家相下車即令堅壁清野寇大至家相謂同城守備曰寇衆我寡當效羅士信破盧明月法可勝密授方略寇果墮伏中遂擒其魁黨馬成孫信輩斬首數百級寇大創遠遁於是招流亡修學校教養兼施墾田六百餘頃築永泉八觀諸壤民賴其力邑以大治疆吏交章薦之以病乞歸辰旦字千之浙江蕭山人順治十三年進士康熙初授上海知縣清苦自勵敏於聽斷數決疑獄豪猾歛迹催科以時不大用鞭朴百姓感其仁輸納恐後瀕海防軍將撤密請行期故邀軍主歡飲宣言期須少緩次日令下促急行乃厚其牛酒道上勞軍軍無敢

遷延他顧居民帖然黃龍浦爲吳淞江入海要口建閘屢圯故事修閘必築壩費不貲辰旦仿浙人爲梁法度基廣狹約丈尺伐石識其甲乙下之水使善泗者厝之悉中程復廣左右護隄約水就道十閱月而工成不病役不糜帑邑人頌之縣田沒水者六千畝賦額未除輸者率破家前令屢勸虛實貿亂至是巡撫慕天顏疏請復勘辰旦喜曰是吾志也日往來泥沙中按舊冊履丈釐其荒者閱二月費皆自辦俸不足出銀釧棉布償之籍上得減除額征有差十八年舉博學鴻儒放還故官復以良吏薦入爲給事中論事切直改大理寺丞母憂歸旋以前廷推事註誤落職卒於家宗堯字二魏漢軍正白旗人廣西總督時隴子以廢入監讀書康熙七年授常熟知縣年甫十九興利除弊勇於爲治老於吏事者勿逮也時漕政積弊糧皆民運往往破家宗堯議定官收官兌之法重困得甦其徵糧則戒期令各自輸肯吏莫由上下其手民便之興文教戢豪強救荒療疫皆以誠懇膺擊出之四年如一日以勞致疾卒於官年二十有三耳民爲罷市釀金發喪遂葬之虞山南麓題其阡曰萬民留葬

宋必達字其在湖北黃州人順治八年進士授江西寧都知縣土瘠民貧清泰懷德二鄉久罹寇民多遷徙地不治請盡蠲逋賦以來之二歲田盡闢縣治瀕河夏雨暴漲城且沒構於神水落按故道疏治之自是無水患康熙十三年耿精忠叛自福建出攻掠旁近地江西大震羣賊響應寧都故有南北二城南民北兵必達曰古有保甲義勇弓弩社民皆可兵也王守仁破宸濠嘗用之矣如其法訓練得義勇二千及賊前鋒薄城下營將邀必達議事曰衆寡食乏奈何必達曰人臣之義有死無二賊本烏合掩其始至可一鼓破也營將遂率所部進賊少却必達以義勇橫擊之賊奔已而復率衆來攻巨礮墮雉堞輒壘補其缺隨方備禦益堅會援至賊解去或言於巡撫縣堡砦多從賊巡撫將發兵必達刺血上書爭之乃止官軍有自汀州還者婦女在軍中悲號聲相屬自傾橐計口贖之詢其姓氏里居護之歸縣初食准鹽自明王守仁治贛改食粵鹽其後苦銷引之累必達請以粵額增准額商民皆便卒以粵引不中額被論罷職寧都人哭而送之餞貽皆不受間道赴南昌中途爲賊所得脅降不屈繫旬有

七日忽夜半有數十人持兵踰垣入曰宋爺安在吾等皆寧都民擁而出乃得脫既歸里江西總督董術國移鎮湖廣見之歎曰是死守孤城者耶吾爲若杏部還故職且以軍功敘必達遜謝之既而語人曰故吏如棄婦忍自媒乎褐衣疏食老於田間寧都人歲時祀之越數年演寇韓大任由吉安竄入寧都境後令萬蹶生踵必達鄉勇之制禦之卒保其城云陸在新字文蔚江南長洲人康熙五年以策論取士在新夙講經濟遂得舉除松江府教授教諸生以質行爲先其以金贖者却之用不足知府魯某分俸助之巡撫湯斌察其廉勤以卓異薦是歲江南七府一州諸長吏被薦者獨在新一人時以此服斌之知人二十年擢江西廬陵知縣賤重有威境內貼然誓不以一錢自污錢穀耗羨革除都盡傍水設五倉便民輸納建問苦亭於衙西訪求民隱時裏糶歷山谷間勞苦百姓軫其災患而導之於善召諸生考德論藝如爲校官時設四門義學刻孝經小學頒行之二十六年江溢民多溺在新急出錢募民船往救躬自倡率出入洪濤中全活無算以受前官虧帑盈萬無所抵憂卒初赴官時子孔奐在

京師燈然曰吾父此行必殉是官矣亟從之卒之日囑書數篋以歛廬陵人爲罷市三日請祀名宦祠長洲人亦以鄉賢祀之

張沐字仲誠河南上蔡人順治十五年進士康熙元年授直隸內黃知縣縣苦賦役不均沐令田主自首不丈而清嚴行十家牌法奸宄斂迹大旱自八月不雨至明年九月民飢甚沐力籌賑捐資爲倡勸富民貸粟官爲書其數俟秋穫取償人爭應之民免轉徙沐爲政務德化令民各書爲善最樂四字於門以自警著六諭數言俾人各誦習反覆譬喻雖婦孺聞之莫不欣欣嚮善五年坐事免十八年以左都御史魏象樞薦起授四川資陽縣途出內黃民遮道慰問日行僅數里既抵任值吳三桂據瀘州相去數百里羽檄如織城中人戶不滿二百沐入山招撫量爲調發供夫驛不缺滇事平以老乞休沐自幼勵志爲聖賢初官內黃講學明倫堂講業恒數百人湯斌過境與語大悅遺書孫奇逢稱其任道甚勇求道甚切沐因以禮幣迎奇逢至內黃講學俾多士有所宗仰及在資陽供億軍興之暇猶進諸生誨導不倦退休後主講汴中兩河之士翕然歸

之多所成就年八十三卒沐之自內黃罷歸也值登封令張堽興書院借耿介同講學爲文紀其事一時稱盛堽字耀如江蘇長洲人以官學教習議敘知縣康熙十七年授登封縣單騎之任途中與登封吏同宿逆旅吏不知也至縣三日拜獄誓不取一錢不枉一人衙前樹巨石鐫曰永除私派設櫃民自封投無羨折招集流亡督之耕種相其土宜課植木棉及諸果實大修學宮復嵩陽書院宋四大書院之一也延耿介爲之師導諸生以程朱之學自縣治達郊鄙立學舍二十一所課童子以時巡閱正句讀導之以揖讓進退之禮問策蹙躐歷諸郊問所苦有小爭訟輒於阡陌間決之西境有呂店者俗好訟堽察里長張文約賢舉爲鄉約俾行化導澆風一變里長申爾瑞負課且受杖路拾人輸稅金反之嘗受責不利人財堽義之旌其門鄉民高鵬舉死妻孟年少舅欲強嫁之孟哭夫墓將自縊堽適徵行問其故給以銀米勸還家而免其徭歲時存問俾終其節縣故多胥役時獄訟日趨姦僞無所容諸胥多自引去其更番執事者退則操耒耜爲農以在官無所得錢也開募嶺二百里復古轅轅路建古賢

令祠修耶公墓崇禎末爲令守城抗賊死者也在官五年民知向方生聚日盛大書官清民樂於門狀介管歎曰年來嵩洛間別一世界矣二十二年以卓異荐擢廣西南寧通判去之日民遮道哭立祠於四鄉肖像祀焉榜曰天下清官第一至南寧未幾乞歸母喪服除赴京師卒

陳汝咸字華學浙江鄞縣人少隨父錫嘏講學證人社黃宗羲曰此程門之楊迪朱門之蔡沈也康熙三十年會試第一成進士選庶吉士散館授福建漳浦知縣民好訟嚴懲訟師無敢欺者縣中賦役故責戶長主辦版籍混淆吏緣爲奸汝咸躬自編審人丁各歸現籍糧戶自封投納用滾單法輪催以三百戶爲一保第其人口多寡供役五年一編丁而役法平吏胥以不便撓之大吏搖惑汝咸毅然不回奸人無所施技民樂輸將賦無逋負俗輕生多因細故服斷腸草死挾以圖財力懲其弊令當刑者掘草根贖罪禁昇神療病曉示方證自製藥以濟貧者毀學宮伽藍祠葺故儒陳貞晟周瑛高登諸人所著書表章之歸誠書院乃黃道周講學地爲僧據逐而新之無爲教者男女羣聚茹蔬禮佛籍

其居爲育嬰堂西洋天主教要大吏將於漳浦開堂卻止之修文廟造祭器時會邑中士紳於明倫堂講經史性理諸書設義學延諸生有學者爲之師修朱子祠教養兼施風俗爲之一變會大水驟漲幾及城堞與錢登城多爲木筏渡一人與錢三十人皆以錢助拯活者數千多方撫卹雖災不害土寇伏七里洞將入海發兵擊之走山中密招賊黨誘禽其渠曾陸等餘黨悉散又禽海盜徐容盡得賊中委曲赦其罪責以招撫諸盜歸誠海氛遂清汝咸任漳浦凡十有八年大吏因南靖多盜調使治之縣民請留不得構生祠曰月湖書院歲時祀之汝咸至南靖諸盜自首就撫開示威信頌聲大作四十八年內遷刑部主事擢御史疏言商船出海掛號無益徒以滋累又言海賊入內地必返其家下海劫掠責之巡哨官未下海之蹤迹責之本籍縣令當力行各澳保甲會海盜陳尙義乞降汝咸自請往撫聖祖命郎中雅奇偕汝咸所薦阮蔡生往尙義率其黨百餘人果就撫擢通政使參議五十二年奉使祭炎帝神農帝舜陵並頒寶駐防兵徧歷苗疆審度形勢撫馭之策歷鴻臚寺少卿大理寺少卿五十三

年命赴甘肅賑荒徒步窮鄉感疫卒於固原漳浦士民聞之奔哭於月湖書院
醜金置田歲祀不絕著有兼山堂遺稿漳浦政略諸書

繆燧字雲隴江蘇江陰人貢生入貲爲知縣康熙十七年授山東沂水縣時山
左饑朝使發賑將購米濟南燧以路遠往返需日且運費多不便請以銀給民
自買當事以違旨勿聽燧力爭以因地制宜之義代草疏奏請得允旣而帑金
不足傾囊以濟之游饑之後民多流亡出私錢爲償逋欠購牛種招徠復業因
捕劇盜已獲復逸被議歸尋復官三十四年授浙江定海縣故舟山也設治未
久百度草創海水不宜穀築塘岸以禦鹹蓄淡修復塘硯百餘所田日增闢繕
城濬濠葺學宮建祠廟役繁而不擾地瘠民貧完賦不能以時踰限者先爲墊
解秋後輸還舊有墾稅出自漁戶網捕之地後漁塗被占苦賠累爲請罷之地
故產鹽無竈戶鹽運使屢檄設廠砌盤官爲收賣燧持不可請仿江南崇明縣
計丁銷引歲完鹽稅銀四十二兩有奇著爲例學額多爲外籍竄冒援宣平縣
例半爲土著半令他縣人認墾入籍以充賦又以土著不能副額擴建義學增

廩額以鼓舞之文教興焉民間日用所需多航海市諸郡城關胥苛索請永禁立石海關海嶼爲盜藪隨監司歷勘凡羊衝下八盡山花腦玉環半邊牛韭諸島權度要害措置之盜風頓戢同歸域者海上死事諸人瘞骨處捐貲修葺建成仁祠以勸忠義懸權慈谿鎮海鄞縣及甯波府事皆有惠政擢杭州府同知未任五十六年卒於定海士民援唐王漁宋趙師旦故事留葬衣冠奉祀於義學名之曰蓉浦書院蓉浦燧自號也遺愛久而不湮光緒中復請祀名宦祠燧任定海前後二十二年賜四品頂戴賜御書後雖擢官迄未離任時朝廷重守令循良多久於其職陳汝咸治漳浦十有八年陳時臨治汝陽亦二十年一邑利病無所不知視如家事故吏治蒸蒸日上云時臨字二咸浙江鄞縣人少從陳錫嘏學得聞證人書院之教家貧游京師三藩之變從軍敘功授湖南城步知縣父憂歸廬墓三年康熙三十年起授河南汝陽縣兵亂之後風俗大壞民不知喪禮時臨爲斟酌古今所可通行者衰絰衆飲之風以息楊埠有支河久淤濬復其舊民獲灌溉之利河南諸縣多食蘆鹽獨汝寧一郡食淮鹽蘆商欲

并之時臨謂蘆鹽計口而授不問其所需之多寡以成額給之是厲民也吾不能謂河南盡革其害反徇商人意以害境內乎力爭得止巡撫徐潮亟稱之於是前後諸大吏皆以爲循吏當令久任數報最數留之時臨亦與民相安於無事後擢兵部主事官囊蕭家臨行百姓扶老載弱相送數十里逾年以病乞歸卒

姚文燮字經三安徽桐城人順治十六年進士授福建建寧府推官建寧俗號獷悍以睚眦讎殺者案山積文燮片言立剖未數月囹圄爲空有方秘者殺方飛熊前令已讞定大辟文燮鞠得飛熊初爲盜管殺秘一家既就撫秘乃乘間復讎不可與殺平人等秘得活大吏謂文燮明允凡疑獄輒委決之有武弁被殺株連衆文燮僅坐數人罪大吏駭曰此叛案何遽輕率文燮曰某所據初報文及盜供也蓋鄉民逐盜弁適遇之從騎未至爲盜所殺而盜逸營中執爲民叛殺弁文燮檢得初報文而盜亦獲自供殺弁故得其情時耿氏建藩其下多估勢虐民貸民錢而奪其妻女文燮悉使訐發爲捐募代償贖歸百數奉檄主

丈田事建寧環郡皆山民依山鑿田每陡峻不能施弓繩文燮授吏勾股法計田廣狹增減爲畝區畫悉當值邊海修戰船或擬按戶口出錢文燮上陳疾苦籌款以代民乃安秩滿報最康熙六年詔裁各府推官去職八年改直隸雄縣知縣渾河泛溢浸城文燮修城築隄造橋利涉者邑貢狐皮爲民累條上其弊獲免地近京畿膏腴多圈佔爲旗產文燮爲民爭之旗人請於戶部遣司官至牽繩量地繩所及民不得有文燮拔刀斷繩司官見其剛直詞稍遜未幾有旨退地還民團練屯丁以資守望盜賊屏迹報墾地獨耗羨減鹽引恤驛政拊循瘡痍民慶更生擢雲南開化府同知攝曲靖府阿迷州事吳三桂叛文燮陷賊中密與建興將軍林興珠有約爲賊所覺被繫乘隙遁謁安親王岳樂軍中王以聞召至京賜對詢軍事甚悉滇寇平乃乞養歸黃貞麟字振侯山東卽墨人順治十二年進士十八年授安徽鳳陽推官嚴懲訟師閣郡慄然大旱禱雨未應貞麟曰得無有沈寃未雪上千天和乎於禱雨壇下立判諸大獄三日果雨江南通賦案興蒙城懷遠天長盱眙各逮紳民百餘人繫獄候勘獄不能容人

皆立貞麟曰彼通賊皆未驗實忍令僵死於獄乎悉還其家及訊則或舞文吏
妄爲注名或誤報或續完悉原而釋之保全者五百家河南優人朱虎山游食
太和髮長數寸土猶范之諫與咎姓有隙誣以蔽匿故明宗室謀不軌事發江
寧推官不敢問以委貞麟貞麟力白其誣逮至京師復勘刑鞫無異乃釋咎姓
而治之諫罪潁州民吳月以邪教惑衆株連千餘人貞麟勘多愚民無知止坐
月及爲首者捕人索財於水姓不得指爲月黨追至新蔡殺之鄉人來救並誣
爲月黨撫鎮發兵圍之繫其衆至鳳陽貞麟廉得實懲捕而盡釋新蔡鄉人其
理枉活人類如此旋以他事解官得白康熙九年改授直隸鹽山知縣地瘠而
多盜立法牌甲互相救護有警一村中半守半援盜日以息清里役逃亡者悉
與豁除不期年流民復業數百家十二年旱謂父老曰大吏使勘災者至供給
惟官是責不費民一錢及秋徵吏仍以舊額進貞麟曰下輸上易上反下難待
准蠲而還之反覆問民必受損立令除之又永革雜派陋例民皆感惠內擢戶
部山西司主事山西聞喜丁徭重力請減之監督京左右翼倉因失察侵盜罷

職卒於家

賂鍾麟字挺生浙江臨安人順治四年進士副榜授安吉學正十六年遷陝西
盤屋知縣爲政先教化春秋大會明倫堂進諸生迪以仁義忠信之道增刪呂
氏士約頒學舍朔望詣里社講演訪耆年有德孝弟著聞者見與鈞禮歲時勞
以粟肉立學社擇民間子弟授以小學孝經飭保伍修社倉莅獄明決所案治
卽勞家居間莫能奪人畏而愛之縣城去渭不十里鍾麟行河畔知水勢將南
侵議自覽家寨迤東開復故道衆難之康熙元年夏大雨渭南溢且及城齋沐
臨禱自跪水中幸雨止水頓減徙而北流者數里兼攝興平鄂兩縣興平豪右
分爲部黨前令不能治廉得其狀收案以法奏最內遷北城兵馬司指揮復出
爲西安府同知八年擢江南常州知府常州縣賦重科條繁多吏緣爲奸鍾麟
立法鉤稽清逋吏受成事而已屬邑該例餽漕羨三千金鍾麟曰利若金如吾
民何峻却之諸漕卒咸斂手奉法初鍾麟在盤屋以師禮數造李頤廬至是創
延陵書院迎顓講學率僚屬及薦紳學士北面聽問爲學之要顓曰天下之治

亂在人人人心之邪正在學術人心正風俗移治道畢矣鍾麟書其言終身誦之已而江陰靖江無錫諸有司爭禮致顛顛爲發明性善之旨格物致知之說士林蒸蒸向風吏治亦和九年大水發倉廩勸富人出粟賑民無荒亡十年夏大旱葛衣草履步禱不應責躬籲天言知府不德累民涕泣並下尋丁母憂士民乞留不可既歸連遭父喪以毀卒郡人論賢有司知治體必首推鍾麟先鍾麟守常州者祖重光崔宗泰皆有名其後有祖進朝政賢尤著重光官至天津巡撫宗泰奉天人順治初授松江府同知以敏幹稱擢常州知府政尚嚴厲善鉤距吏民驚爲神明十三年大兵征閩過郡久駐人情恆擾宗泰先期儲待纖悉備具有游騎入村落逐婦女溺水死宗泰夜叩營門白將軍縛置之法時時單騎巡行遇小有剽奪隸傳呼崔太守來皆引避去民得安堵令甲府漕以推官監兌推官儒而衛弁橫宗泰自請於漕督檄之監兌盛駒從帶刀鞭臨倉弁卒悚懼竟事無譁尋以事左遷福建延平府同知後乞免歸進朝亦奉天人以廢監起家康熙二十三年由部郎擢授常州知府有惠政以失察鑊級去士民

呼籲於巡撫湯斌請留進朝斌上疏言進朝履任未一載操守廉治事勤臣私心重之頃緣失察法實事降調常州五縣士民輒號泣罷市赴臣請留日不下數千人臣諭以保留例已久停士民謂常州四十年未有愛民如進朝者其減繇輕耗興學正俗戢奸除暴息訟安民窮鄉僻壤盡沾惠澤朝廷軫念東南如江甯府知府于成龍特恩超擢吏治丕變進賢操守才幹可與成龍頡頏而獨以一省被謫士民攀留言之泣下臣不知進朝何以感人之深如此臣受事四日始獲法實是受事之日已爲失察之日且當候處分何敢代人瀆奏惟臣蒙恩簡畀封疆大任屬吏之敗檢者得糾劾之廉能者不能爲之一言非公也民情皇皇如是而不爲之解慰安輯非仁也畏罪緘默而使輿情不上聞非忠也敢據情陳奏章下部議格不行聖祖諭曰設官原以養民湯斌保奏祖進朝清廉百姓同聲懇留可從所請以勸廉吏進朝復任未幾以老疾乞免民恆思之不置云

趙吉士字天羽安徽休寧人寄籍杭州順治八年舉人康熙七年授山西交城

知縣縣居萬山中地產馬饒灌木時禁民間牧馬停南堡村木廠民困往往去爲盜武弁路時運食而擾民民殺時運作亂與大同叛將姜瓖合連破諸邑及瓖誅餘盜匿山中吉士到官定先撫後勦之策有投撫者給示令招其黨調知羣盜陰事選鄉兵得技優者百人令紳戶家出一丁與民均役分夕巡城行保甲法匿賊者連坐隣盜相戒不入境時交城多抗賦河北都者賦倍他都吉士往諭朝廷德意勗以力耕勿爲盜衆悚息日暮寢陶穴中聽訟左右多賊黨吉士陽若勿知詰朝深入察其形勢最險者曰三坐窪東西兩葫蘆川繞其下塞葫蘆口則官軍不得登吉士默識之而還交山賊楊芳林芳清等時出肆掠九年春吉士入山勸農撫姜瓖舊卒惠崇德詢得二楊所在命二卒立擒至杖繫之賊渠任國鉉鍾斗等糾衆尾之不敢發會有陝西叛弁黃某入葫蘆川與國鉉合吉士謀間之遣山民持書付國鉉等僞誤投黃所黃得書疑國鉉等率衆去國鉉等既失黃弁無所恃有投誠意靜樂盜李宗盛踞周洪山遣其黨趙應龍劫清源吉士遣惠崇德入山說國鉉等令獻趙應龍可免罪國鉉與宗盛給

應龍縛付崇德應龍恨爲所賣盡發諸盜陰謀吉士會兵勦宗盛復遣崇德往說國鉉等使無動遂擒宗盛賊黨益渙十年廷旨下總督治羣盜期盡勦絕吉士曰交山劇賊不過十餘人其它率烏合一聞盡勦恐山中向化之民畏罪自疑反爲賊用今靖安堡初復請協兵三百以駐防爲名尅期入山可一戰禽也靖安堡者近葫蘆口三十里昔以屯兵吉士就廢壘新築之守備姚順率兵至縣吉士約期進屯先期七日置酒大享客夜半席未散吉士上馬會師疾驅四十里至水泉灘分三隊一襲東葫蘆一襲西葫蘆自偕姚順進駐東坡底爲兩葫蘆要道東西賊援並絕國鉉等爲內應呼曰官兵入山矣兩葫蘆賊皆走上三坐厓吉士遣人至厓下語之曰汝等良民毋爲賊脅官且按戶稽丁不在卽以賊論衆乃稍稍去僅存二百餘人分兵要賊去路賊四竄被獲頗衆分搜巢穴縱降賊質其妻子俾捕他賊以自贖入山旬有六日盜悉平乃召山中民始終不附賊者二十七家資以羊酒立爲約正其素不與徭役者千四百三十家編其籍入都圖自後交山無賊患吉士初患山路險阻命每都具一圓鱗比爲

大圖召父老詢徑途曲折注之以次及永甯靜樂隣縣諸山每獲賊善遇之因得諸賊蹤迹上官知其能不拘以文法用卒成功治交城五年百廢具舉內遷戶部主事監揚州鈔關擢戶科給事中忌者劾其父子異籍被黜尋補國子監學正四十五年卒祀交城名宦祠

張瑾字去瑕江南江都人康熙二年舉人十九年授雲南昆明知縣時吳三桂初平故軍衛田隸藩府者徵租量豐歉收之事平沿爲額民不能供又軍興後官司府署器用皆里下供應而取給於縣故昆明之徭尤重於賦瑾請於大吏奏減其賦不可乃蠲盡荒地招流亡給牛種薄其徵以濟軍衛之賦一年墾田千三百餘畝三年得萬餘畝又均其徭里蠶無科派奸民無包收諸侵漁弊皆絕民舊供縣公費日十金瑾曰吾食祿於君不食傭於民革之總督曰陳仲子之廉能理劇乎又問今家幾何人對曰子一客與僕各二闌之信皆驚異自公費除而上之取給者亦減昆明池受四山之水夏秋暴漲怒流入閘河沙石壅塞水乃溢浸瀕池田歲勞民力濬之晉甯州境毘於昆明受東南諸箐之水舊

迹有河道入江上官議鑿之以通閘河瑾按地勢爲圖白之曰閘河獨受昆明之水已不能吐納沙石旁溢爲害豈可更受晉甯水乎且其地高若建瓴沙石犖确尤甚殆不可治臺司持之堅則指圖爭曰高下在目何忍陷民於死總督范承勳曰令言是也議遂寢縣有止善春登利城諸里田均埤錯出不旱則潦瑾廉得旁近有白沙馬鬣清水三河可資蓄洩年久湮塞率民濬治三月河復田以常稔大小東門外舊皆市兵後爲墟盜賊窟其中爲創造室廬以居流亡移城中騾馬羊諸市實之貨廩牧場相比盜遂絕迹安阜園者故藩園也請耕之以食孤貧廢疾而無告者是時上官多賓者每倚信瑾兵備道欲以流民所墾田牧馬求之期年不與久亦稱其直將軍僕殺人按察使置酒爲請陽諾之退而正其罪巡撫僕子謀奪士人聘妻即縣庭令士人行合巹禮判曰法不得娶有夫之婦婦乘我輿堦乘我馬役送之歸有奪者治其罪時人作歌詩以傳之初至滯獄以百數斷訖皆當後一省疑獄輒付瑾治屢有平反居三年病卒士民圖其像藏之請祀名宦祠

江臬字在涇安徽桐城人順治十八年進士觀政刑部父病乞養歸喪除授江西瑞昌知縣故事歲一巡鄉堡校戶籍飲輿馬費臬罷之縣城近河孺岸善崩屢決改道環城無隍民病汲臬出俸金率先衆力築堅堤濬壅塞水復其故形勢益壯民居遂蕃三藩叛縣界連湖南土寇乘間起臬曰吾民緣飢寒出此迫之則走藉寇飭鄉保長開諭撫安而密督丁壯巡察屢擒其魁盜遂息居七歲考最遷九江府同知尋擢甘肅鞏昌知府大軍入蜀治辦軍需值歲除檄徵騾馬千匹芟芻器具取具倉猝臬策畫便宜供應無缺士卒驕悍所過漁奪百姓臬遇輒縛送軍主斬以徇繇是肅然越四歲調廣西柳州時新收嶺西兵猶留鎮軍中多掠婦女臬白大吏檄管帥籍所掠送郡資遣凡數百人軍餉不繼士譁噪將變臬馳諭緩期趣臺司發餉應期至軍乃戢郡民王纘緒故官家子經亂產爲四奴所據隻身寄食僧舍臬詰得之悉逮捕諸奴奴懼納二千金乞免佯受之訊伏罪乃出金授纘緒命奴從歸盡還其產柳人歌誦之太和殿大工興使者采木民大恐長老言故明采木於此僵仆谿谷橫藉不可數臬曰上命

也何敢匿諱使者至令民前導自控騎借使者往視巨木森挺絕巘下臨深谷
下騎掖使者攀援以登厓益峻無側足所使者咋舌曰是不可取還奏免役民
誰呼戴上恩德尋被薦提學四川以母喪解官服闋補陝西平慶道副使遷福
建興泉道參政以事左遷旋以恩復職卒於家臯於廣西聲績最著其後稱張
克疑賈樸克疑字偉公山西聞喜人康熙十八年進士選庶吉士改刑部主事
累遷郎中有獄連執政族人諸司莫敢任克疑請獨任之內務府以其人出使
爲辭克疑鉤提益急牒問奉使何地歸何期力請部長入告事雖格聞者肅然
出爲廣西平樂知府獠獠雜居盜不可詰克疑至浹月以信義服苗酋獲巨盜
二人斃其一宥其一責以偵緝終其任盜不敢窺調廣東潮州屬縣賊蠡起或
稱明裔衆衆千餘人克疑疾馳至其地命吏士速據白葉祁山設疑兵賊不敢
逼會夜半大風起簡健卒二百斫其營呼曰大兵至矣城中鼓噪出兵以助之
賊奔祁山要擊之斬其渠魁三人衆散乞降巡撫將上其功克疑曰此盜耳而
稱明裔興大獄株連多恐轉生變乃以盜案結郡有大豪戕親迎者於路而奪

其妻克疑徵行迹而得之獄成當大辟監司以督撫命爲之請曰稍遲緩之當有以報克疑曰吾官可罷獄不可戮也卒實諸法或假親王命以開礦縛執之其人出龍牌克疑命繫之獄以牌申大府情既得立杖殺之丁父憂歸遂不出年七十六卒樸字素庵直隸故城人貢生康熙二十三年授廣西柳州同知有政聲思明土屬負固抗官大吏知其能調任思明治之夜遣健卒潛入山焚賊寨遂出降署思明知府土田州岑氏母子相爭土目陸師等搆之以爲利殺人千餘樸至切諭母子俱感泣師等聚衆謀不軌先懼以兵單騎往曉以禍福乃聽命建明倫堂設義學代完寒士通糧民立生祠奉之擢貴州平越知府呈誤去官樸在廣西嘗條上邊事巡撫彭鵬奇其才四十年詔舉廉吏鵬特疏薦授江南蘇州知府與吏民相見以誠屏絕請託政聲大起四十六年聖祖南巡幸蘇州嘉其清廉爲吳中最擢江常鎮道吳民數千人遮道請留賢守御書宜民區額賜之調蘇松常鎮太糧儲道布政使參政仍兼管蘇州府事從民願也革四府徵糧例規積弊一清忤總督噶禮據事劾之四十九年去官留吳門三年

歸甲卒

邵嗣堯字子昆山西猗氏人康熙九年進士授山東臨淄知縣有惠政以憂去十九年服闋補直隸柏鄉興水利滅火耗禁差擾民安之縣人大學士魏裔介爲出嗣堯會試座主家人犯法嚴治之不少貸又有旗丁毒毆子錢家人縣庭勢洶出嗣堯不稍屈繫之獄移文都統訊主者主者不敢承具論如法值歲饑或言勸積粟家出粟嗣堯曰人惟不積粟故歲饑則束手吾方斡令積粟家獲厚利何勸爲已而獨粟者衆歲不爲災有言開滄陽河通舟楫者巡撫于成龍使嗣堯往相度嗣堯力持不可謂此河旱潦不常未可通舟楫即或能通恐舟楫之利歸商賈挑浚之害歸窮民矣事遂寢盜殺人於縣界立捕至置之法或毀於上官以酷刑奪職尙書魏象樞奉命巡視畿輔民爲申訴事得白于成龍復薦之補清苑嗣堯益感奮自勵屢斷疑獄人以包孝肅比之二十九年尙書王駕薦嗣堯清廉慈惠行取擢御史三十年出爲直隸守道持躬清介苞苴杜絕遇事寔發機激勢要憚之所屬州縣肅然奉法三十三年江南學政缺聖祖諭

曰學政關繫人材朕觀陸隴其邵嗣堯操守學問俱優若以補授必能秉公校士革除積弊時隴其已卒遂命嗣堯以參議督學江南既蒞事虛衷衡校論文宗尚簡質著四書講義傳示學者甫試三郡以積勞遘疾卒身無長物同官欽賚致賻乃得歸葬士民思之爲立祠肖像以祀焉聖祖澄清吏治拔擢廉明近歲尤多賢吏如彭鵬陸隴其及嗣堯當時皆循名上達聞於天下鵬及隴其自有傳又有衛立鼎高蔭爵靳讓治績亦足媲美立鼎字慎之山西陽城人康熙二年舉人授直隸盧龍知縣地當兩京孔道驛使旁午供張糗糈悉自營辦不以擾民先是縣中徵糧勺抄以下皆用升合量納草以銀代仍抑價買諸民間立鼎令輸戶舍納奇零統歸斛斗徵草則以本色輸民甚便之興行教化獎拔士類丕變其俗尤以清廉著稱尙書魏象樞及侍郎科爾坤奉命巡畿內至盧龍已治具不肯食僅啜一甌曰令飲盧龍一杯水耳吾亦飲令一杯水諸大獄悉以咨之立鼎引經準律象樞大稱善于成龍之巡撫直隸也嘗迎駕於霸州奏舉循吏以立鼎陸隴其並稱嗣堯巡撫格爾古德以事至盧龍謂立鼎曰令之

苦無異秀才時秀才徒自苦今令苦而百姓樂非苦中之樂乎疏薦立鼎治行
第一靈壽令陸隴其次之內遷戶部郎中秩滿授福建福州知府以年老致仕
歸教授鄉里以倡論道學爲事年七十有六卒蔭爵字子和奉天鐵嶺人隸漢
軍康熙初調選授直隸蠡縣知縣縣多旗屯居民田之半佃者倚勳貴爲奸利
持吏長短河數決孟嘗村歲比不登民大饑蔭爵至曰吾未暇理他政且活民
倉有粟二萬石請發以賑牘再上不許請解官乃許之五千石蔭爵曰若今歲
又惡民不能償二萬石五千石等死耳吾且活吾民乃盡發之更出帑五百金
貸民種麥夏旱蝗起捕蝗盡秋又大霖雨河暴溢率吏民冒風雨捍禦堤完而
歲大熟民乃安某甲以財雄諸佃多爲不法誣諸生爲奴而籍其田按治得實
置之法豪猾懼服莫敢犯令於是設義倉置鄉學尊禮賢士民大和悅調三河
一以簡易爲治或問之曰前令已治矣何紛更爲前令彭鵬也聖祖校獵至三
河問父老高令與彭令孰賢對曰彭廉而殺高廉而和上稱善擢順天府南路
同知于成龍問以捕盜方略條上三事略言盜旗屯爲遁逃藪請嚴保甲首實

之令使無所匿而平日能使之衣食粗足則可不至爲盜成龍驤之會丁父艱歸成龍總督南河築界首隄以屬蔭爵隄成上南巡閱工召見賜克食起復補湖北德安府同知累擢四川松茂道直隸口北道皆有惠政卒於官子其倬官至大學士自有傳讓字益庵河南尉氏人康熙十八年進士授浙江宣平知縣旱災請蠲甚力巡撫張鵬翮以爲賢父憂去服闋授山西汾西會親征漠北供張杜絕擾累民力不足請以正賦辦治行取擢御史數上疏言察吏安民實行教養聖祖諭曰朕御極四十年惟冀天下黎庶盡獲安全邊疆無事如靳讓所言必令家給人足無一人凍餒此非朕所可必者恐其不過徒爲大言曩者錢珏衛既齊亦曾爲此言及後用爲大吏皆不能自踐其語靳讓曾爲縣令其所爲能如是乎通州驛馬事繁著調爲通州知州果能如所言朕即超用上意欲試之也許其便宜啟奏讓布衣廩馬之官皇莊旗莊恣肆病民繩以法不少貸私錢私鑄悉禁止時禁河捕魚誣累平民讓分別治之奸商藉權貴勢謀專賣麥豆及設蓋肆牟利並拒絕上聞皆韙之會學政更替命九卿舉所知上曰朕

亦舉一人命以僉事督學廣西逾年調浙江除弊務盡教士先德行而後文藝
值南巡召對褒獎曰汝不負朕舉朕將用汝爲巡撫讓以母老乞終養賜御書
天庥堂額以榮其母尋母喪以毀卒

崔華字蓮生直隸平山人順治十六年進士康熙六年授浙江開化知縣政務
寬平建塾校藝士爭嚮學縣舊有里總主賦稅橫派滋擾除之又以虛糧爲累
請豁於上官未竟其事十三年耿藩亂作縣南墾戶多閩人豎旗以應城守千
總吳正通賊陷城露刃相逼華從間道出檄召十六都義勇鄭大來夏祚等涕
泣開諭立聚萬人躬冒矢石閱五日城遂復總督李之芳上其事詔嘉之時閩
寇方熾分三路犯浙衢州當中路之衝縣城再陷慘掠尤甚民無叛志華率兵
退保遂安圖恢復時出有所擒斬大兵扼衢州久與賊持十五年春始遣將由
遂安復開化至秋大破賊軍浙境漸清流亡初集積逋尤多華圖上遺黎困苦
狀乞爲請命盡蠲十三年至十六年額賦贖民之流徙者俾得完聚疫癘盛行
廣施藥餌全活無算先後論功十九年擢江南揚州知府值湖河並漲屬縣被

災者衆華加意撫恤二十三年命九卿舉中外清廉之吏廷推七人外吏居其三華爲首焉擢署兩淮鹽運使軍興商困乃權宜變通令先行鹽後納課務與休息商力甦而賦亦無缺先是湖南諸府因兵蠲引三十九萬有奇至是有請補行蠲引者華以兩淮浮課重又帶加斤若補蠲引必致額售者滯銷誤課力言不使事得寢三十一年遷甘肅莊涼道未行卒准商祠祀之周中鉉字子振浙江山陰人康熙中爲江南崇明縣丞崇明故重鎮兵籍千人欲預取軍食於官不獲穀刃譁噪官吏咸避匿中鉉獨挺身前宣布順逆利害感切聳動衆皆投械散擢華亭知縣民有被誣殺人久繫獄中鉉立出之而坐其實殺人者提標兵庇盜前令莫敢問中鉉捕治置諸法境內又安四十二年秋大霖雨以風海水驟溢漂數縣迺具衣槨棺槥救卹之又爲請賑蠲租活民甚衆雍正四年以催科不及格罷縣民萬數遮言上官聞於朝得復職時左都御史朱軾被命修海塘知中鉉賢悉以事付之塘成丁母憂民復籲留中鉉先已擢松江知府至是予假治喪還視府事五年議浚淞婁諸水以中鉉署太倉知州董其役六

年二月築壩於陳家渡一再潰與千總陸某晝夜冒險指揮倉卒覆其舟既歿而築台事聞贈太僕寺少卿當中鉉令華亭時奉賢猶隸境內後析爲縣中鉉適爲知府至是民懷其澤奉以爲奉賢城隍之神歲時祈報著靈異長洲王芑孫爲廟碑紀其事道光七年巡撫陶澍復濬吳淞江疏請立廟江干

劉榮字弢子山東諸城人康熙二十四年進士三十四年授湖南長沙知縣以廉明稱時訛言裁兵撫標千人環轅門大噪榮爲開陳大義預給三月餉示無裁意衆乃定總督吳璵以循良薦之三十七年擢陝西寧羌知州關中大饑漢南尤甚州無宿儲介萬山中艱於輓運榮請貸隣邑倉粟約民能負一斗至者予三升不十日輓三千石大吏下其法賑他邑咸稱便又奉檄賑洋縣移粟沿漢而下榮先徧歷審勘尅期給發數日而畢謂洋令曰此粟貸之官倘民不能償吾兩人當代任比秋大熟洋縣民相勉還粟不煩催督始寧羌地苦凋瘵榮爲均田額完通賦補棧道修旅舍安輯招徠期年而廬舍萃集山多榭葉民未知蠶遣人旋鄉里齋蠶種募善蠶者教之人習其利名所織曰劉公綢士苦無

書爲召賈列肆分購經籍建義塾視爲講解四十一年擢甘肅寧夏中路同知末赴母憂去以代民完賦負累不能行屬弟代售遺產不足弟並以已產易金償負民聞之爭輸金爲助卻不受服闋補長沙府同知入覲奉溫旨試文藝於乾清門即日擢山西平陽知府裁汰陋例蠲除煩苛訟牘皆立剖決之四十八年九卿應詔舉廉能吏以知府被舉者惟榮與陳鵬年二人四十九年擢直隸天津道副使迎駕浣津詔許從官恭瞻親洒宸翰榮因奏兄果昔官河間知縣奉清廉愛民之褒乞賜御書清愛堂額上允之歷江西按察使四川布政使五十五年上詢九卿本朝清介大臣數人求可與倫比者九卿舉四人榮與焉駕幸湯泉又以榮治狀語諸從臣會廷推巡撫共薦榮上嘉納之以四川用兵未經調五十七年卒於官兄果官山西太原府推官有聲改河間知縣康熙八年駕幸河間問民疾苦父老陳果治狀召見褒之卒祀名宦榮子統勳孫壩曾孫鏗之並爲時名臣自有傳

陶元淳字子師江蘇常熟人康熙中舉博學鴻詞以疾不與試二十七年成進

士廷對論西北賦輕而役重東南役均而賦重願減浮額之糧罷無益之費閱者以其言懸置二甲三十三年授廣東昌化知縣到官首定賦役均糧於米均役於糧裁革雜徵自坊里供帳始相率以力耕爲業縣隸瓊州與黎爲界舊設土舍制其出入吏得因緣爲奸元淳立撤去一糧量定法度黎人便之城中居人舊不滿百家至此戶口漸蕃元淳時步行間里間周咨疾苦煦嫗如家人瓊郡處海外軍將多驕橫崖州尤甚元淳嘗署州事守備黃鎮中以非刑殺人游擊余虎縱不問且貪索黎人獻納元淳廉得其狀列欵以上虎私以金賄之不得造蜚語揭之總督石琳下瓊州總兵會訊元淳申牘曰私揭不應發審鎮臣不應侵官必挫執法之氣灰任事之心元淳當棄官以全政體不能蒲伏武臣貽州縣羞也初鞠是獄鎮中令甲士百人佩刀入署元淳據案怒叱曰吾奉命治事守備敢令甲士劫持是戕國法也鎮中氣懾疾揮去卒定讞論罪如律廷人爲語曰雖有余虎不敵陶公一怒而總督卒因元淳偏彊坐不檢驗失實會赦免復欲於計典黜之巡撫蕭永藻初授事曰吾初下車便劾廉吏何以率屬

爲言於總督乃已元淳自奉儉約在官惟日供韭一束喜接諸生講論至夜分不倦屢乞病未果竟以勞卒於官昌化額田四百餘頃牛淪於海賦不及二千浮糧居三之一民重困元淳爲浮糧考屢請於上官乞豁除無應者乾隆三年元淳子正靖官御史疏以入告竟獲俞旨免焉

廖冀亨字瀛海福建永定人康熙二十九年舉人四十七年授江蘇吳縣知縣值歲旱留漕賑饑不足自貸金易米以濟士人感其誠相率捐助賑以無乏吳中賦額甲天下縣尤重冀亨減火耗用滾單民皆稱便知收漕弊多拘不法者重治之凡留難勒索錫斛淋尖高颺重飾諸害掃除一清太湖中有蘆洲或墾成田或種蓮養魚官吏輒假清丈增糧名以自利冀亨曰湖蕩偶爾成田未可久持今增其賦朝廷所得幾何而民累無盡期一無所問初冀亨莅任時有吳人語之曰吳俗健訟然其人兩粥一飯肢體薄弱凡訟宜少準速決更加二字曰從寬冀亨悚然受之收詞不立定期民隱悉達嘗自謂訟貴聽聽之明乃能速決而無冤抑在吳三年非奸盜巨猾行杖無過二十蓋守此六字箴也有庠

生授徒鹽商家自刎死勘得實或有誘其受賄者冀亨無所避卒釋鹽商勿罪
東山巡檢報鄉人弑父屠嫂未遂自盡冀亨方乘二燭閱其詞燭無風齊滅知
有冤尅日渡湖往驗大風舟幾覆從者色變冀亨曰縣官伸冤理枉而來神必
佑之何懼須臾抵岸訊得父故殺狀巡檢得賄誣報俱論如律冀亨既有聲於
吳他縣疑獄往往令推治會有宜興知縣誣揭典史故勘平民爲盜刑夾致死
冀亨奉檄按驗知縣者總督噶禮之私人也或告宜少假借冀亨不爲動檢踝
骨無傷原揭皆誣獄上噶禮屢駁詰再三審卒如冀亨議以是忤總督時巡撫
張伯行以清廉著深契冀亨布政使陳鵬年尤重之而噶禮不擇於伯行尤惡
鵬年四十九年鵬年被劾並及冀亨以虧帑奪職逾年噶禮敗冀亨始復原官
以病不赴選及卒吳人祀之百花書院冀亨歿後家留於吳入籍嘉定曾孫文
錦嘉慶十六年進士由翰林出爲河南衛輝知府有惠政祀名宦文錦子惟勳
道光十三年進士亦由翰林爲貴州鎮遠知府撫苗有法終貴陽府

佟國瓏字信侯奉天人隸漢軍籍康熙三十年由筆帖式授山東文登知縣縣

俗愚悍有勸治宜嚴峻者國瓏曰爲政在誠心愛民興利除害化導之而已嚴峻非民之福也副將某以醜妓餽軍大噪夜半斬關出屯東郊國瓏聞變單騎往諭曰吾與軍民同疾苦有冤當訴我何妄動爲衆猶洶洶國瓏當砲立曰吾不忍見爾曹族誅請先試若砲衆動色曰公廉明軍何敢犯然事已至此奈何國瓏力任保全究其故得實縛妓撲之衆泣拜而散副將尋被勅去歲饑奸民騷動國瓏歷村墟給賑撫諭捕治凶渠民賴以安邑豪宋某以隣婦貨錢不償息殺之吏役得賂皆爲豪掩又以千金賄國瓏國瓏怒覆驗婦有重傷鞠得其情置豪於法邑故瀕海副將林某縛商舶之泊島嶼者數千人指爲寇國瓏訊釋之別捕誅真盜四十餘人五十年擢山西澤州知州歲稔發常平倉以貸民尅期輸還無爽又減耗羨革陋規省徭役平物價民情大悅國瓏嘗以論事忤太原知府某某嗾人誣揭之坐罷任州民鳴鐘鼓罷市欲詣闕既而得白留原任時平陽民變巡撫檄國瓏以兵往國瓏曰是速之亂也單騎馳赴民皆頷手曰佟公至吾屬無慮矣乃安堵受撫五十九年以疾乞免後以所屬高平令

虧帑被逮責償萬金民感其惠捐金投州庫代償其半云

陸師字麟度浙江歸安人少負文名康熙四十年進士授河南新安知縣修學校集諸生治經童子能應試者免其徭民興於學響馬賊季國王爲患久捕誅之巡鹽使者下縣取鹽犯四十人師曰律以人鹽並獲始爲犯今勸犯止二人何濫爲父憂歸在途有六七騎挾弓矢驅牛車載婦女三十餘人言歸德饑民某將軍買以歸者也師叱止之令官還婦女於其家白將軍收其騎卒或謂已去官胡忤將軍師曰知縣一日未出境忍以饑民婦女媚將軍耶服闋補江蘇儀徵有盜引良民爲黨師親馳往捕見壞器滿地言有暴客食此不償值因而鬪毀詰其人狀與盜肖事得白春徵勸富戶先輸秋則減其耗令自封投櫃故事驛夫臨時取給鋪戶倉猝滋擾一切禁革但令戶日賦一錢歸驛商賈以安揚州五縣饑大吏令縣各以五千金糴穀備賑具舟車往則虛而歸師察知府意欲縣官借補所虧也力爭於是五縣皆得穀以賑卻鹽商例餽固請乃籍其入以修學宮具祭器樂舞浚泮池植桃李其上修宋文天祥祠又以其餘建倉

廉潔治圉質庫書票故有月無日勿論久近皆取一月息師辭其歲餽令視他縣月讓五日舊有豬稅下令蠲除之課最行取擢吏部主事升員外郎掌選有要人求官力持不可督山東礦務條上開採無益罷其役還擢御史巡河獄皆稱職康熙六十一年河督陳鵬年疏請以師爲山東衮沂曹道未到官卒祀名宦祠龔鑑字明水浙江錢塘人早與同郡杭世駿齊名雍正初以拔貢就選籍授江蘇甘泉知縣縣新以江都析置故脂膏之地鑑恥爲俗吏一以子惠黎元振興文教爲己任故某侍郎子與有舊入謁有所屬拒之有同城官爲大吏所昵令伺察屬吏者有挾而請又拒之巨室延飲又拒之於是大江南北盛傳甘泉令不近人情鑑益自刻苦無一長物縣境邵伯埭受高寶諸湖之水地卑下鑑謂當於農隙運土築高埂沿隄爲防以徐議溝洫隄上即植桑興蠶事其西境地高洩不雨即龜坼宜每一里爲水塘以蓄之如是則高下之田俱無患大吏躓之然不能行邵伯埭下有芒稻河設閘洩水尤要值大水泛溢鑑冒雨至呼閘官洩之閘官以鹽漕爲言不可會總河嵇曾筠視河至鑑直陳厲

聲訶開官曾筠即令啓闢又用鑑言定鹽漕船過湖需水不過六尺過即啓闢無得藉口蓄水爲民田患每歲晏江都之鰥寡孤獨多入甘泉部中西湖聖因寺僧明慧者侍前在內廷法會恩寵千求徧於江浙一日以書幣關白鑑杖其使而遣之事流傳上聞世宗召明慧還京綱不許出當是時甘泉令聲聞天下在任六年以父憂去官貧至無以葬河南巡撫尹會一故爲揚州守雅與鑑善招之欲使主大梁書院以修脯助葬遂卒於河南鑑洪深經術能摘先儒之誤顧書多未成所成者毛詩疏說闡明李光地之說爲多

清史稿

列傳

循吏二

陳惠榮

芮復傳

傳林

閔堯熙

王時維

藍鼎元

葉新

葉昭庭

陳慶門

周人龍

童華

黃登賢

李渭

謝仲玩

李大本

牛運震

顧景陶

邵大業

周克開

顧景陶

汪輝祖

顧景陶

劉大紳

顧景陶

紀大業

朱休度

陳惠榮字廷彥直隸安州人康熙五十一年進士授湖北枝江知縣修百里洲隄除轉餉雜派雍正三年遷貴州黔西知州父憂歸服闋署威甯府未幾威甯改州補大定知府烏蒙土司叛東川鎮雄附之惠榮赴威甯防守城陴頗圮倉

粹聚米桶實土石比次整築墉堞屹然賊焚牛衝鎖去城三十里惠榮日夜備戰賊不敢逼總兵哈元生援至賊敗走尋以母憂去官服闋授江西上饒九南道九江大孤兩關銅弊盡革之乾隆元年經略張廣泗疏薦擢貴州按察使時羣苗交煽軍事方殷古州姑盧朱洪文諸叛案惠榮治鞠詳慎重輕咸稱其情衆心始安及苗疆漸定駐師與屯將吏多以刻急見能二年貴陽大火惠榮謁經略曰天意如此當竭誠修省苗亦人類曷可盡殺廣泗感動戒將吏如惠榮言四年署布政使疏言黔地山多水足可以疏土成田小民難於工本不能變瘠爲腴山荒尤多流民思墾輒見撓阻桑條肥沃亦不知蠶繅之法自非牧民者經營而勸率之利不可得而興也今就鄰省雇募種棉織布飼蠶紡績之人擇地試種設局教習轉相仿效可以有成應責各道因地制宜隨時設教一年必有規模三年漸期成效詔允行乃給工本築墉堰引山泉治水田導以蓄洩之法官署自育蠶於省城大興寺繅絲織作使民知其利六年疏陳課民樹杉得六萬株七年貴筑貴陽開州咸甯餘慶施秉諸州縣報墾田至三萬六千畝

開野蠶山塲百餘所比戶機杼相聞惡榮據以入告數被溫旨嘉獎又大修城郭壇廟學舍廣置栖流所收行旅之病者益囚糧冬寒恤老疾嫠孤之無衣者親課諸生勗以爲己之學設義學二十四於苗疆風氣丕變十一年遷安徽布政使振風頴水災流移獲安十二年卒於官惠榮在貴州興蠶桑爲百世之利時遵義知府陳玉鑿山東歷城人到郡見多榴樹土人取爲薪炭玉鑿曰此青萊樹也吾得以富吾民矣乃購歷城山蠶種兼以蠶師來試育五年而蠶大熟獲繭八百萬自是遵綢之名大著正安州吏目徐階平亦自浙江購繭種仿玉鑿行之正安亦大食其利遵義鄭珍著檇繭譜以傳玉鑿遺法

芮復傳字衣亭順天寶坻人原籍江蘇溧陽康熙四十八年進士授浙江錢塘知縣悉除諸無名錢曰官足給饗殮而已有金三者交通上官署爲姦利立逮杖斃之一時大快五十八年大旱復傳勘實上狀上官欲寢之固爭曰律有捏災匿災並當劾某今日請受捏災罪時同城仁和民千人跣走圍署曰錢塘爲民父母仁和獨不父母我耶上官感動竟以災聞開倉行賑復傳設粥廠二十

有七徵行規視治胥吏之侵擾者帑不費而賑溥駐防營卒馳躡民田便宜懲治輒縛而鞭之治績上聞世宗特召引見擢溫州知府故事貢柑歲期至織造封園民以爲累復傳第取足供貢不使擾民府境私鹽充斥設三團集隨戶平其直私販息官鹽不督自行天台山東南有山曰玉環在海中總督李衛欲開田設治檄復傳往勘以徒費無益陳請罷之衛怒檄他吏往意必行時山中田僅二萬畝乃割天台樂清兩縣民田隸玉環經費不足則捐通省官俸又加關津一切雜稅以給之弛山禁漁者往來並稅曰塗稅既而漁者不入山者度關納稅亦徵其塗稅復傳爭曰是重稅也其贖凡七上衛益怒以爲阻撓玉環墾田事蜚語頗聞劉統勳奉使視海塘過溫州語之曰君與李宮保兩雄不相下不移不屈君之謂乎尋擢溫處道會銅商積弊敗露復傳持法又揭劾知府尹士份不職士份反誣以阻商誤銅大吏故嫉之遂并劾復傳解任總督趙宏恩質訊坐失察關吏舞弊奪職會高宗登極詔仍留浙江辦銅事竣例得復官以親喪歸遂不出家居三十餘年卒年九十有四蔣林字元楚廣西全州人康熙

五十四年進士選庶吉士授檢討直南書房十年不遷大將軍年羹堯欲辟爲幕僚林急告歸尋調戶部郎中出爲福建邵武知府以事解職詔發浙江歷杭州嚴金華三府在杭州值織造隆昇建議改海門尖山海口別開河以固海塘林極言不可曰能使海不潮則役可興否則勞民傷財萬無成理上書督撫俱不省雍正十二年三月夜牒下索杭夫萬五千人合旁郡無慮數萬人期三日集海上林又爭曰田蠶方亟期會迫萬一勿戢奈何必不得已俟蠶功畢隆昇怒督益急以抗旨脅之四月送役往面詰以工不可成狀隆昇益怒留林督役以困之冒雨撫泥深沒脛役人感其誠咸盡力隆昇復虐使動以捶撻衆屢譁噪徹林事幾殆役迄無成隆昇得罪去乾隆初召至京入對即日擢長蘆鹽運使錢時院司歲各費數萬緡林率以儉歲費百緡而已羨餘悉歸公居四年以親老乞養高宗曰世乃有不願久爲長蘆運使者耶久之卒於家

閻堯熙字涑陽河南夏邑人原籍山西太原康熙四十五年進士五十二年授直隸藁城知縣淳沱常以秋溢築隄樹木椿以捍其衝夾岸種柳隄固水不爲

患雍正元年調南宮擢晉州知州瀕漳沱河河決徙道蕩析民居堯熙爲籌安集民免於患扶携老稚來謝堯熙曰此朝廷恩我何與令望闕拜人給百錢以資裹糧散錢十萬咸感泣曰眞父母也怡賢親王奉使過境聞其名奏循良第一擢山東青州知府未之官改授浙江嘉興俗健訟良儒不得直訟府下縣或不理奸猾益無忌堯熙始至日受狀三百比對簿自請息者二百餘庭折數十各得其情豪民張某稔惡訊實杖殺之民皆稱快屬縣賦重名目糾紛里胥因緣爲姦民完如額官不知民亦不自知官累以缺賦課殿去堯熙巡行清理民始知額歲無通賦海鹽縣塘工不就總督李衛聽浮言欲開引河洩潮堯熙言涵水入內河田皆傷非特壞廬舍糜帑金已也議遂能營弁緝私鹽縱其梟持他人抵罪堯熙言其誣總督不聽庭爭再三總督乃自勘釋之愈以賢堯熙累擢湖北按察使四川布政使皆持大體有惠政乾隆七年卒於官堯熙質直好面折人過雖上官不少避然勇於從善在川藩多得成都知府王時翔之助人兩賢之時翔字皋謨江蘇鎮洋人爲諸生績學未遇雍正六年世宗重選守

令命中外官各舉一人同州人沈起元官興化知府以時翔應詔即授福建晉江知縣時福建吏治頹廢遣使按視多吏請守令有司頗尚操切晉江民好訟時翔至曰此吾赤子忍以盜賊視乎一以寬和爲治坐堂皇响响作家人語曲直既判令兩造釋忿相對揖由是訟者日衰觀風整俗使劉師恕按泉州委時翔鞫疑獄二十餘事語人曰晉江長者決獄又何精敏也尋調政和又調甌甯擢漳州府同知駐南勝南勝民族居峒中多械鬪有賴唱者糾衆奪犯匿險自固時翔親入山諭之曰汝諸賴萬人奈何庇一人而以死殉耶爲我縛唱來即無事唱不得已自縛出治如律瀨子坑民葉揚煽亂時翔謂緩之可一紙定或張其事大吏檄入山勦之事平意不自得乞病歸乾隆元年以薦起山西蒲州府同知擢成都知府以廉率屬善審機要錢騰布政使榜平其直市大譁時翔方在假召成邵華陽二令曰市直當順民情抑之錢閉不出奈何言於布政撤其榜錢價尋平議徙涼州兵於成都拓駐防城當奪民居二千家時翔檢故牘請曰城故容兵三千見兵一千五百尙虛其半第出見所侵地足矣奚拓爲

已而涼州兵亦不果徙成都當康熙時人希穀賤旗兵利得銀至雍正以後生聚多穀貴又願得穀或徇其意令民受銀購穀給兵未幾漢兵亦欲仿行時翔曰旗兵例不出城語言與土人殊故代購漢兵皆土著奚代爲二事亦賴布政力主其議得止至七年江南湖廣災巡撫奏運蜀米四十萬石濟之湖廣急米來領運江南則否巡撫乃檄下縣餽運舳舻蔽江商賈不通成都薪炭俱絕時翔謂江南運可緩徒病蜀請獨運楚而聽商人自運江南時堯熙既歿竟無用其言者時翔在成都屢雪疑獄時稱神明九年卒

藍鼎元字玉霖福建漳浦人少孤力學通達治體嘗泛海攷求閩浙形勢巡撫張伯行器之曰藍生經世之良材吾道之羽翼也康熙六十年臺灣朱一貴倡亂鼎元從兄南澳鎮總兵廷珍率師進討多出贊畫七日臺灣平復從廷珍招降人殄遺孽撫流民綏番社歲餘始返著論言治臺之策大意謂土地有日闢無日蹙經營疆理則爲戶口貢賦之區廢置空虛則爲盜賊倡亂之所山高地肥最利墾闢利之所在人所必趨不歸之民則歸之番與賊即使內亂不生寇

自外來將有日本荷蘭之患不可不早爲措置時議者謂臺灣鎮當移澎湖鼎元力言不可大吏採其說見諸施行鼎元復爲臺灣道條十九事曰信賞罰懲訟師除草竊治客民禁惡俗儆吏胥革規例崇節儉正婚嫁興學校修武備嚴守禦教樹畜寬租賦行墾田復官莊恤澎民撫土番招生番後之治臺者多以爲法雍正元年以選拔入京師分修一統志六年大學士朱軾薦之引見奏陳時務六事世宗善之尋授廣東普甯知縣在官有惠政聽斷如神集邑士秀異者講明正學風俗一變調權潮陽縣事歲荐飢多通賦減耗糧除苛累民爭趨納妖女林妙貴惑衆竄之法籍其居建棉陽書院以竹監司罷職總督鄂彌達疏白其誣徵詣闕逾年命署廣州知府抵官一月卒鼎元尤善治盜及訟師多置耳目劾捕不稍貸而斷獄多所平反論者以爲嚴而不殘志在經世而不竟其用著鹿洲集東征集平臺紀略棉陽學準鹿洲公案傳於世

葉新字惟一浙江金華人康熙五十一年順天舉人從蠡縣李塉受業立日譜自檢尤嚴義利之辨雍正五年以知縣揀發四川授仁壽縣有與隣縣爭地界

者當會勘鄉保因閹人以賄請新怒悉下之獄勘畢各按其罪由是吏民斂手奉法署嘉定州故有沒水田多逋賦新視曠土可耕者召民墾闢以新科抵賦額舊逋悉免時仁壽採木部匠倚官爲暴民勿堪糾衆相抗縣以變告檄新往治之抵匠頭及首糾衆者於法餘釋不問遷卬州知州再遷夔州府同知署龍安及成都知府又署瀘州知州訟者至立剖決滯獄一空治瀘兩載俗一變焉新自授夔州同知閱五載始一蒞任尋又署保寧順慶兩府擢雅州知府母憂歸乾隆十年服闋補江西建昌修旰江書院招引文士與講論學術復南城黃孝子祠以勵民俗十三年南豐令報縣民饒令德謀反令德好拳勇令以風聞遣役往偵誤探其讎謂謀反有據遂逮令德適他往乃逮其弟繫獄令德歸自詣縣受刑誣服雜引親故及隣境知識爲同謀追捕蔓及旁郡新得報集諸囚親鞠株連者已七十餘人言人人殊新詰縣役捕令德弟狀役言初至其家獲一篋疑有金寶匿之及發視無所有棄之野令聞意篋有反迹訊以刑妄稱發篋得簿劄納賄毀之矣令謂實然遂逼令德誣服新於是盡釋七十餘人縲紲

命隨往南昌戒之曰有一逋者吾代汝死矣及至七十餘人則皆在謁巡撫具道所以巡撫愕不信集才能之吏會勘益雜逮諸所牽引卒無據而巡撫已於得報時遽上奏朝命兩江總督委官就讞新爲一一剖解得白所全活二百餘人十七年調贛州有贛縣搶奪拒捕之獄值改例新舊輕重懸殊新謂事在例前當依舊比爭之不得復以寧都民獄事與同官持異同不得直謝事閉門候代上官慰諭不從遂以任性被劾免歸欣然曰今而後可無疚於心矣家居十餘年卒施昭庭字筠瞻江蘇吳縣人康熙五十四年進士授江西萬載知縣地僻多山客民自閩粵來居之累年積三萬餘人號曰棚民溫尙貴者臺灣逸盜也亦處山中雍正元年福建移捕盜黨急尙貴謀爲變始昭庭之至也以棚民爲慮厚禮縣人易廉野使偵之廉野積粟貸棚民不取息或免償得棚民心其才者嚴林生羅老滿從廉野游盡得山中要領尙貴將舉事廉野以聞昭庭林生老滿率勇敢三百人待之尙貴有衆二千肆掠昭庭曰賊易破也然慮其擾傍縣撫賊諜使誑尙貴趨萬載乃張疑兵於山徑賊不敢入山官道來預設伏

叢棘中伺賊過突出擊殺賊數中伏疑駭逆擊之一戰獲尙貴尙貴起二日而敗又二日而撫標兵至初柵民與市人積嫌事起道路洶洶指目柵民陷庭以免死帖與諸降者取柵民不從賊者結狀兵至搜山不戮一人巡撫初到官張其事入奏既見縣申狀不合欲改之陷庭不可又謂柵民匿盜從亂今雖赦之必驅歸本籍陷庭曰柵民種植口給非刀手老瓜賊之比歷年多生齒衆間與居民爭訐細故不必深懲今亂山臺灣逸盜而平盜悉資柵民力請覈戶口編保甲泯其主客之形寬其衣食之路長治久安於計便總督查弼納許之巡撫尋亦悟如陷庭策柵民乃安事聞世宗諭九卿曰知縣以數年心力辦賊巡撫到官幾日豈得有其功耶獨下總督疏議叙以主事知州用尋引疾歸卒於家陳慶門字容駟陝西盤屋人雍正元年進士從鄂王心敬講學養親不仕母王趣之乃謁選七年授安徽廬江知縣修建文廟規制悉備大潞城濠置義田二百畝有奇贍養獨立社倉四所積穀以貸平民縣民舊習止知平疇種稻高阜皆爲棄壤因市牛具仿北方種植法躬督墾闢遂享其利尋署無爲州事州

瀕江上下二百里率當水衝前人築壩四常沒於水慶門於鮑魚橋鮑魚口二處樹椿編竹實土爲坦坡又取亂石填擲水中水停沙淤久而成洲民免墊溺之患又署六安州舊有水塘議者欲墾塘以爲田將絕灌溉之利慶門力言於上官事乃寢十一年擢亳州知州俗悍好羣鬪倚彊役表裏爲奸慶門廉得其魁黨先後杖遣數百人又好訟仿古鄉約法使之宣導排解動於聽斷日決數十事不數月澆風一變州瀕湖地窪下川秦中收淀之犂法督民挑濬地下者漸高水歸其壑農田賴焉母憂歸乾隆元年服闋以大臣薦補四川達州知州境環萬山歲常苦旱教民種旱稻始無艱食之憂隣郡巴州桑柘素饒乃買桑徧植教以分繭繅絲之法獲利與巴州等時川東多流民官廩不給遂釐剔腴田之被隱占者爲義產以贖之全活甚衆建宣漢書院聘名流教授文風漸振未幾乞病歸著仕學一貫錄世以儒吏稱之

周人龍字雲上直隸天津人康熙四十八年進士授山西屯留知縣興學賑荒有聲調清源境內洞渦嶽峪諸河入汾常有水患濬渠築堰民賴之歷忻州直

隸州知州蒲州知府蒲郡瀕黃河水邊徙無常山陝兩省民隔河爭地訟數十年不結人龍請於大吏曰臨河灘地當以河爲界河東邊則山西無地之糧歸陝西河西邊則陝西無地之糧歸山西糧隨地起不缺正賦因地納糧無累民生山陝沿河二千餘里凡兩省湮沒之地令地方官照糧查地按地過糧除鹵城者照例題請免徵其餘水退之地招令沿河民認糧承種庶事無偏枯爭訟可息夫吏從其議至今便之雍正初有言丁糧歸地便於無力之丁不便於有田之家人龍駁之略曰有田者尙以輸納爲艱豈無田者反易君子平其政焉得人人而悅之今不悅者不過紳衿富戶而大悅者乃在勞勞無告之小民若因其控告而不行則豪強得志而窮民終於無告此議在當日未行則已耳今行之數年勞難中止窮民狃於數年樂利必不安於一旦變更且富民少而窮民多不當以彼易此議上事乃定以變去官服闋補湖北安陸數月擢江西督糧道未行江水決鍾祥三官廟隄及天門沙溝皖招集鄰縣民諭以利害同築禦踴躍荷畚鍤至者數萬人親冒風雨率以施工或勸其已遷官何自苦人

龍曰助夫由我招至我去即散矣伏汛一至民何以堪閱兩月工成安陸人尸祝之江西漕糧徵運素多弊嚴立規條宿盜一清乾隆十年乞病歸卒

童華字心樸浙江山陰人年未冠爲諸生長習名法家言出佐郡邑治雍正初入貲爲知縣時方修律例大學士朱軾薦其才世宗召見命察賑直隸樂亭盧龍兩縣報饑口不實華倍增其數怡賢親王與朱軾治營田水利至永平問灤河形勢華對其晰王器之尋授平山知縣邑災不待報遽出倉粟七千石貸民擢眞定知府權按察使以前在平山發粟事部議免官特詔原之怡賢親王奏以華理京南局水利華度眞定城外得泉十八疏爲渠溉田六百畝先後營田三百餘頃溢陽河發源磁州州民欲獨擅其利自春徂秋閉閘蓄水下游永年曲周涵涓不得時改州歸直隸以便控制華建議仿唐李泌明湯紹恩西湖三江兩閘遺規計板放水數縣爭水之端永息華又以北人不食稻請發錢買水田穀運通倉省漕費民得市稷黍以爲食從之調江蘇蘇州會清查康熙五十年以來江蘇負課千二百餘萬巡撫督責急速捕追比無虛日華固請寬之

巡撫怒曰汝敢逆旨耶對曰華非逆旨乃遵旨也上知有積欠不命嚴追而命清查正欲晰其來歷查其委曲或在官或在役或在民或應徵或應免了然分曉奏請上裁乃稱詔書意今奉行者不顧名思義徒以十五年積欠立求完納是暴征非清查也今請寬三月限當部居別白分牒以報巡撫從其請乃盡釋獄繫千餘人次第造冊請奏時朝廷亦聞江南清查不善下詔切責如華言浙江總督李衛嘗捕人於蘇華以無牒不與衛怒蜚語上聞世宗召見責以沽名干譽對曰臣竭力爲國近沽名實心爲民近千譽上意解命往陝西以知府用署肅州佐經略鄂爾泰屯田事鑿通九家窩五山引水穿渠溉田萬頃以忤巡撫被劾罷官乾隆元年起福州知府調漳州頗好長生術招集方士習丹家言復幼罷歸數年卒華剛而忤時屢起屢蹶在蘇州民德之尤深以比明知府況鍾當世宗治畿輔營田時所用者多一時賢守令有黃世發名與華相媿云世發字成憲貴州印江人康熙三十五年舉人授直隸肅寧知縣舊例錢糧加一二作耗銀世發亦收之而不自用雜派畝銀三四錢悉除之縣有役事若修學

校繕城垣及上官別有攤派即以耗銀應河間府檄修府城親齎餼糧出錢雇役不以撥社甲視民如家人教以生計坑鱸荒地令穿井耕種綠城植桑柳樹萬株凡水車蠶箔糞灌紡績悉爲經畫復闢護城廢地穿池種稻以導之建社學教以孝親敬長贖官田九十餘畝以其租爲學者膏火旬三日集諸生講學會文士有自隣縣來學者雍正三年水災大吏遣官履勘世發不能得其意被劾罷士民呼籲挽留特詔復官加四品銜已晉授按察使兼直隸營田觀察使巡行勸民農桑察水利可興者所至剴切宣諭民多興起修隄墾田變汗下爲沃壤最後開易州水峪田經營年餘以勞卒

李渭字棗涯直隸高邑人父兆齡康熙中官福建閩清知縣以廉能稱渭康熙六十年進士授內閣中書遷刑部主事雍正二年出爲湖南岳州知府詔許密摺奏事忤大吏左遷武昌府同知未之任丁母憂服闋授四川嘉定知府復以爭冤獄忤上官渭曰吾官可棄殺人媼人不爲也奉檄賑重慶水災多所全活父爰歸後補河南彰德萬金渠源出善應山環府城入洹河灌田千數百頃山

水暴發易淤涸履勘濬治增開支河建閘啓閉定各村分日用水歲以有秋漳河當孔道舊設草橋於臨漳道回遠移於豐樂鎮行旅使之雪武安民班某誣殺族兄獄林縣富室毆人死賂屍屬以病死報涓驗屍骸骨盡碎治如律舉卓異乾隆九年擢山東鹽運使時議增鹽引涓以增引則商不能賠必增鹽價商民且兩病持不可十二年山東大水大吏檄涓勘災至益都博興樂安諸縣餓卒載途而有司先以未成災報已入告難之乃請以借作賑異日免追民乃蘇十三年就遷按察使折獄平嘗曰古人言求其生而不得今俗吏移易獄詞何求生不得之有然如死者何此婦寺之仁非持法之正尋遷安徽布政使禁革徵糧長單差催法以杜詭寄調山東墾荒令客民帶完舊欠免鄰保代賠逃戶之累民便之爲政持大體不吝出納不輕揭一官馭吏嚴而不念舊過十九年卒於官子經芳乾隆中官至湖南施南知府亦廉謹守其家風

謝仲玩字孔六廣東陽春人雍正元年舉人登明通榜初官長甯教諭乾隆初擢授湖南常甯知縣岐却餽遺履鄉自裹行糴嚼生菜蔬供饌月兩課士以節

行相勸勉調平江再調衡陽前令李澎徵漕米浮收斛面糧儲道謝濟世發其奸時巡撫許容方以浮收誣劾濟世總督孫嘉淦亦徇巡撫意故濟世與澎並免言官論奏朝命侍郎阿里袞往按署糧道倉德又因布政使函屬改換衡陽浮收詳文據以上揭詔責切究事急澎則盡出賄賂簿以脅上官阿里袞重興大獄欲出澎浮收罪與濟世俱復官仲玩乃重治澎丁役以決罰過當被劾罷官逾年特起爲衡山知縣以讞巴陵獄巡撫與按察使互奏奉旨引見擢荊州府通判又以歸州縱盜兇良之獄自巡撫按察以下皆被重譴仲玩承審時堅不會印特旨召對擢常德府同知歷署襄陽寶慶宜昌武昌永順岳州永州七府知府護永郴桂道正躬率屬屏絕請託暇輒延耆士論學不倦仲玩官湖南先後三十年長於折獄大吏倚重歷奉檄鞫獄二百餘多所平反以直懸名乾隆三十七年在永州議改准引食粵鹽格於例不行遂以目疾請告解組日貧如故卒於家李大本字立齋山東安邱人雍正十三年舉人乾隆九年餘授湖北棗陽知縣改湖南益陽居官自奉儉約勤於吏事益陽人不知蠶大本教之

樹桑後賴其利調長沙遷寶慶府理搖同知所隸通通水峒有苗僧行賈臨桂知縣田志隆見之意爲賊黨吳方曙者從馬朝桂謀叛時方繪圖懸購者也僧畏刑誣服又訊朝桂所在妄言在峒中廣西巡撫定長立上奏率兵出命大本從行大本曰僧言眞僞不可知大兵猝至苗必駭且生變請潛訪之既而白僧言實妄巡撫疑未釋復欲以兵往大本力諫乃止後廷訊苗僧果誣如大本言橫嶺峒苗乏食籲官求粟大本多方賑之復爲苗民籌生計請於上官曰橫嶺峒自逆渠授首安插餘苗因惡其人故薄其產每口授田才三十積至四十積每積上田獲米六升中田五升下田四升得米無多又峒田稍腴者盡與保率極惡者方畀苗民歲入不足男則斫柴易米女則剝蕨爲粉給口食年來生齒日繁材木竭米價益昂飢餓愁嘆深可憐憫恐不可坐視而不爲之所見有入官苗田一千三百四十八畝舊募漢民佃種出租供餵奸良不一屢經陶汰請視苗民家貧丁衆者書諸簿有漢佃應除者即書簿之苗丁次第受種出租如故則苗民得食而餒亦無虧乃補救之一端議上不許後巡撫陳宏謀見之曰

此識時務之言也將陳其事會他邊未果二十一年題請升授知府因病足歸卒於家

牛運震字階平山東滋陽人雍正十一年進士乾隆元年召試博學鴻詞不遇尋授甘肅秦安知縣開九渠溉田萬畝縣北玉鍾峽山崩塞河水溢爲災運震率丁夫開濬凡四日夜水退緣山步行以錢米給災戶縣衆曰西固去治二百餘里輸糧苦運艱多積逋運震許以銀代納民使之先是巡檢某誣馬得才兄弟五人爲盜前令弗察得才自刎死其兄馬都上控令又誘而斃之獄其三人者將解府運震鞫得其情昭雪之又清水縣某令冤武生杜其陶父子謀殺罪上官檄運震覆治驗死者得自刎狀以移屍罪其陶而釋其子他訟獄多所平反官秦安八年惠農通商暇則行視郊野鑄農具教民耕耨稱貸販褐戶不求其息設隴川書院日與諸生講習民始向學兼攝徽縣又攝兩當縣葺舍於三縣之中曰大門鎮以聽訟徽縣多虎募壯士殺虎二十六道始通調平番值縣境五道峴告饑捐粟二百石以賑民感之人輸一錢製衣銘德運震受衣返幣

固原兵變四掠督撫皆至涼州檄召運震問方略運震請勿以兵往但屯城外爲聲援令城內擄出亂者游擊某執三百餘人衆汹懼運震請釋無辜入城慰諭斬三人監候四人餘予杖徒有差反側遂安有忌者據前受萬民衣事劾免官貧不能歸留主皋蘭書院教學得士心及歸有走千里送至瀟橋者運震居官不假手幕下事輒自治所至嚴行保甲門爭訟獄日即於少遇人干訟必嚴懲治盜尤嚴曰邊鄙風俗疵悍不如此則法不立令不行民不可得而治且與其輕刑十人不如重處一人而九人畏是懲一而恕九也罷官歸後閉門治經搜考金石所著經義史論文集及金石圖皆行於世嘗主晉陽河東兩書院所造多名雋士世稱空山先生張甄陶字希周福建福清人舉鴻博補試未合格罷大學士朱軾侍郎方苞薦修三禮辭而請受業於苞乾隆十年成進士時方許極言直諫甄陶對策因極陳時務選庶吉士授編修尋改授廣東鶴山知縣歷香山新會高要揭陽皆劇邑所至有聲疆田疇修隄圩弛蛋戶蠹覬之禁增建書院社倉平反冤獄詰捕盜賊爲政務無佛逆於民以憂去官服除起授雲

南昆明弗獲於上官坐事免主講五華書院尹壯圖錢禮皆其弟子復移掌貴州貴山書院課士有法總督劉藻疏薦詔加國子監司業銜晚以病歸閩主龍峯書院以經義教閩士於是咸通漢唐注疏之學在滇時著經解百餘卷方甄陶之補外人咸惜之大學士陳世倌贈以明呂坤呻吟語甄陶讀其實政錄而慕之在粵作學實政錄見其書者咸曰循吏之言也

邵大業字在中順天大興人舊籍浙江餘姚雍正十一年進士乾隆元年授湖北黃陂知縣初到官投訟牒者盈至不移晷決遣立盡吏人一見問姓名後無不識衆莫敢弄以事有兄弟爭產訟皆頌白貌相類令以鏡鏡而問曰類乎曰類則進與爲家人語曰吾新喪弟獨不得如爾兩人白首相保也二人感動罷去蛟水壞城當壞處立誓以殉水驟止振溺舖飢完隄岸民得免患總督以其名上聞會父憂去服闋授河南禹州知州調睢州類滂請糶賑民以免患浚惠濟河以俸錢更直掘江南蘇州知府松江盜獄久不決株連瘞斃者衆奉檄鞠治見羣犯皆斷脛折踝蹙然曰爾等亦人子迫飢寒至此尤茹刑顛倒首從

誣連非罪人何益於爾有盜幡然曰官以人類待我我不忍欺獄辭立具兼署蘇松太道尋攝布政使事大吏交章薦十六年高宗南巡御舟左右挽行名嚴鬚絳大業語從臣除道增絳必病民非所以宣上德意遂改單絳會積雨治吳江帳殿未就總督劾大業觀望及乘輿至則供備已具然大業卒因左遷尋授河南開封知府屬縣封邱民被控侵占田畝及勘丈非侵占而畝浮於額大業考志乘河南賦則自明萬厯改併中地十畝作上地七畝下地十畝作上地三畝上官以昔爲下則今則膏腴議加賦大業曰此河衝淤積百姓以墳墓田廬所易之微利也今日爲退灘淤地異日即可爲沙壓水衝冬春播種夏秋之收穫不可知上年河決屋宇未盡蕪流亡未盡復遽增歲額何以堪旋從部議試種三年次年果沒入水乃止未幾以河溢降江南六安州知州又以盜案鐫級引見再還江南署江甯府二十八年授徐州知府府城三面瀕黃河西北隅尤當衝雖有重隄恃韓家山埽爲固大業按視得蘇公舊隄起城西雲龍山迄城北月隄長三里漚爲民居復其舊越歲韓家山埽幾潰民恃此隄以無恐復浚

荆山橋河於水利宣洩規畫盡善治徐七年間有水患不病民三十四年坐妖匪割辨事罷職謫戍軍臺數年卒大業所至以勸學爲務因黃陂二程子祠建義學葺睢州洛學書院集諸生親爲之師焉

周克開字乾三湖南長沙人乾隆十二年舉人十九年以明通榜授甘肅隴西知縣調寧朔縣屬寧夏府並河有三渠曰漢來唐延大清皆引河入渠灌田唐延渠所經地多沙易漫克開治之使深狹又頗改其水道渠行得安渠有石竇洩水於河以備旱澇民謂之暗洞時暗洞崩塞渠水不行上官欲填暗洞而竭唐延入漢來以便寧夏縣之引河寧夏利而寧朔必病克開恐夏秋水盛無所宣洩時新水將至不可待克開請五日爲期取故渠及廢闢之石晝夜督工五日而暗洞復兩縣皆利大清渠長三十餘里鑿自康熙間久而石門首尾壞民失其利克開亦修之皆費省而工速再以卓異薦擢固原知州父憂去服闋補洮州尋擢貴州都勻知府從總督吳達善侍郎錢維城治貴州逆苗獄川法有失當者力爭無少遜調貴陽亦以強直忤巡撫宮兆麟因公累解職引見復授

山西蒲州知府調太原清釐積獄修復風峪口堤堰障山潦導之入汾民德之
擢江西吉南贛寧道署布政使以王錫侯書案被議高宗知其賢發江南以同
知用會南巡克開署江甯府迎駕授江西九江知府尋擢浙江糧儲道時巡撫
王亶望貪黷屬吏多重徵以奉上官克開至誓不取一錢請於巡撫約與之同
心亶望姑應之心厭克開乃奏克開才優請移治海塘於是調杭嘉湖道會改
建海岸石塘總督欲徙柴塘近數百丈以避潮克開曰海與河異讓之則潮必
益侵無益也乃止年餘以督工勞瘁卒克開在甯朔治水績最著生平治獄多
平反禮儒士嘗以私錢興書院沒無餘資天下稱清吏當時守令以興水利著
者又有鄭基康基淵言如泗後有周際華基宇築平廣東香山人以諸生入貲
爲知縣乾隆間銓授安徽鳳臺縣東鄉有通川三日黑濠曰溼泥曰裔溝匯穎
上蒙城諸縣水以達淮歲久盡涇秋潦輒成巨浸侍郎裘日修奉使治滙穎諸
水獨不及鳳臺基具牘陳利害及工事甚悉日修允其請基察土宜穿故渠三
河交暢釀上游諸水以通匯流不逾時工成魯松灣地遠淮而卑頻患潦捐俸

倡築隄障遂成膏腴調定遠舉卓異擢壽州知州安豐塘古芍陂也塘圯基審覈舊制繕復之爲水門三十六爲閘六爲橋一其旁則爲塢爲堰爲圩畝閉以時汙萊盡闢嘗循行阡陌見沙地磽确多不治教民種薯預佐菽麥俾無曠土壽州不知蠶織而地多椿櫟可飼蠶購蠶種教民飼之農桑並興其後遇旱獨鳳臺壽州秋成稔於他縣以水利修也遷泗州直隸州知州振水災飢而不害擢江蘇淮安知府淮安爲衆水所聚於城東濬泗市河於北開漁濱山字河於西開護城河壅滯悉通民便之基博覽前史於河渠水利圖經丹鉛殆徧施行輒有成效乾隆四十一年擢江南守巡道命甫下而卒基淵字靜溪山西興縣人乾隆十七年進士歸班銓授河南嵩縣知縣舊傍伊水有渠十一久湮絕基淵按行舊址勸民修復山澗諸流可引溉者皆爲開渠渠身高下不一者分段設閘以蓄洩之田高渠下者則教爲水車引溉凡開新舊渠十八灌田六萬二千餘畝巡撫上其事優詔議叙尋以憂去服闋授甘肅鎮原調臬隨擢肅州直隸州知州洪水渠岸峻易崩基淵度勢於南石岡引鑿渠口以避沖陷之害野

豬溝有荒田無水久廢基淵詢訪耆舊加寬柳樹開龍口別開子渠界荒田爲七區招民佃種區取租十二石給各社學名曰新文渠州東南九家窩鑿山後渠開屯田舊駐州判主之久之田益薄瘠民租入不足支官役基淵請汝州判改屯升科爲籌歲修費民於是有恆產基淵治官事如家事博求利病在嵩縣植桑教蠶出絲甲於他邑以無業之地建社學三十二所在肅州開郊州廢灘種楊十餘萬株徧諭鄉堡種樹薪樵取給建社學二十一所又於金佛清水兩鄉建倉以免徵糧借囤民房之累革番民採買需索皆有實惠四十四年擢江西廣信知府卒於官如泗字素園江蘇昭文人言子七十五世孫乾隆三年高宗臨雍如泗以賢裔陪祀賜恩貢生充正黃旗官學教習十四年銓授山西垣曲知縣城濱黃河修石隄以捍水堯河故有數渠復於上游濬之分以溉田民稱言公渠調聞喜涑水湍急舊渠多圯別濬新渠食其利者五村舉卓異擢保德直隸州知州新疆軍興徵調過境值歉歲如泗經畫曲當民無所累陝西巡撫明德聞其能而薦之乞養歸父喪除補解州白沙河在城南地如建瓴南決

則害鹽池北決則壞城如泗請於大吏用鹽帑修築兩岸石堰長五里又挑運渠本以護鹽池民田不能灌溉故事商民分修商盡諉之於民力爭乃仍舊貫二十九年擢湖北襄陽知府如泗愛士恤民而治盜賊在解州民間夜不閉戶襄陽素爲盜藪聞其至盜皆遠遁三十四年因失察屬員能職尋以皇太后萬壽祝嘏復原官遂不出嘉慶十一年卒於家年九十一光緒中祀名宦際華字石藩貴州貴筑人嘉慶六年進士內閣中書親老乞改教職歷遊義都勻兩府教授以薦擢知縣道光六年授河南輝縣百泉出縣北蘇門山衛河之源也其西諸山水經縣南入衛曰峪河其北諸澗水歷縣東入新河曰東石河新河者自縣北鑿渠引衛河至縣南復入衛又稱玉帶河皆資疏洩利灌溉時並淤塞遇水輒苦漂溺際華履視溝渠出俸錢率民釀資浚峪河修紅石堰疏新河鑿東石河六十餘丈堅築其岸諸渠綺交脈注潦患以息課民種桑四萬株教之育蠶他樹亦十五萬株於是邑有絲絮材木之利蘇門故多名賢祠宇咸新之修明祀事以厲風教焉署陝州直隸州知州自灑池入陝道硤石五十餘里險

惡爲行旅所苦際華別開平道往來者便之迴避改授江蘇興化縣富裏下河之下游水患尤急際華議開欄江壩以洩湖河之水鹽官及商皆力爭以爲壩開則水南下溜急於鹽舟牽挽不便際華曰彼所爭者十四里牽挽之勞以較揚州東七縣田廬場墾之漂溺獨免賑恤之煩費輕重何如總督林則徐聽其議調江都兼署泰州毀淫祠百餘區改爲義學則徐疏薦之尋告歸卒於家先是輝縣及興化民皆不習織際華輒自出資置織器教之轉相授於是二縣有衣被販賣之利至今賴之輝縣請祀名宦祠

汪輝祖字龍莊浙江蕭山人少孤繼母王生母徐教之成立習法家言佐州縣幕持正不阿爲時所稱乾隆二十一年成進士授湖南寧遠知縣縣雜糶俗積逋而多訟前令被訐去黠桀益肆挾持又流丐多強橫輝祖下車即捕其尤驅餘黨出境民納賦不及期手書諭之曰官民一體聽訟責在官完賦責在民官不勤職咎有難辭民不奉公法所不恕今約每旬以七日聽訟二日較賦一日手辦詳稟較賦之日亦兼聽訟若民皆遵期完課則少費較賦之精力即多聽

訟之功夫民感其誠不逾月而賦額足治事廉平尤善色聽援據比附律窮者
通以經術證以古事據漢書趙廣漢傳鉤距法斷縣民匡學義獄據唐書劉蕡
傳斷李蕭兩氏爭先隴獄判決皆曲當而心每欲然遇匪人當子杖輒呼之前
曰律不可道然若父母膚體奈何行不肖虧辱之再三語罪人泣亦泣或對簿
者反代請得免卒改行爲善良每決獄縱民觀聽又延紳耆問民疾苦四鄉廣
狹肥瘠人情良莠皆籍記之寄遠例食准鹽直數倍於粵鹽民食粵私大吏遣
營弁偵捕輝祖白上官以鹽愈禁則值愈增私不可縱而食淡可虞請改准引
爲粵引未及報輝祖即張示鹽不及十斤者聽偵弁謂其縱私輝祖揭辨總督
畢沅嘉之立弛零鹽禁時偉其議兩署道州又兼署新田縣皆有惠政以足疾
請告時大吏已疏調輝祖善化又檄訊隣邑獄囚足疾久不赴疑其規避奪職
歸里閉戶讀書不問外事值紹興西江塘圯巡撫吉慶強輝祖任其事帑節工
堅時稱之舉孝廉方正固辭免輝祖少尙氣節及爲令持論挺特不屈而從善
如轉圜所著學治臆說佐治藥言皆閱歷有得之言爲言治者所宗初通籍在

京師待銓主同郡茹敦和論治最契同時朱休度並以慈惠稱敦和字三樵浙江會稽人初嗣婦翁李爲子占籍廣東乾隆十九年成進士歸本宗授直隸南樂知縣慎於折獄以片紙召兩造立剖曲直當咎者薄責之民輒感悔自新擇清白謹愿者充社長里正令密陳利弊以次行之縣當豬龍河之衝察河源委於開州清豐之間審地形高下因勢利導水不爲患地多茅沙鹽鹹教以土化之法廣植雜樹鄉民以麥稽編笠爲生敦和勸種桑調大名漳水患劇旁有渠河敦和謀開渠以殺其勢適內遷大理寺評事不及上請乃手書揭城門勸民刻期集河干親爲指示民具畚鍤來者以萬計經旬而渠成後利賴之尋復出爲湖北德安府同知署宜昌知府緣事降秩卒祀直隸名宦祠子蔡以一甲一名進士官至兵部尙書休度字介斐浙江秀水人乾隆十八年舉人官饒縣訓導以薦授山西廣靈知縣值大荒疫流亡過半休度安撫招徠糧籍舊未清履勘勸耕一年而荒者墾三年而無曠土糧清賦辦獲優叙尤善決獄對把子妻張以夫出飢欲死易姓改嫁郭添保疑郭爲賂賣詰朝手刃所生子女二而自

劉休度詣驗婦猶未絕目郭作聲曰販販察其無他情讞定杷子乃歸衆曰汝欲知婦所由死問朱爺休度語之狀並及其家某事某事杷子泣曰我歸愆期至此勿怨他人矣稽首去薛石頭借妹觀劇其友目送之薛怒刃傷其左乳死自承曰早欲殺之死無恨越日復詰之曰一刃何即死也薛曰刃時不料即死曰何不再刃薛曰見其血出不止心惕息何忍再刃遂以誤殺論減戍休度嘗曰南方獄多法輕情重北方獄多法重情輕稍忽之失其情矣待人以誠人亦不忍欺周知民情訴曲直者數語處分民皆悅服數年囹圄一空舉卓異嘉慶元年引疾歸縣人懇留不得乞其壺山垂釣小像勒諸石歿後祀名宦休度博聞通識尤深於詩以其鄉朱彝尊錢載爲法任校官時採訪遺書得四千五百餘種撰總目上諸四庫大學士王杰爲學政任其一人以集事時盛稱焉

劉大紳字寄庵雲南甯州人乾隆三十七年進士四十八年授山東新城知縣連三歲旱大紳力拯之調曹縣代者至民數千遮道乞留大吏爲留大紳三月及至曹縣旱災更重於新城大紳方務與休息河督檄修趙王河決隄集夫萬

餘人以工代賑兩月竣事無疾病逃亡者既又檄辦河工稽料三百萬大紳以時方收斂請緩之大吏督責益急將按以罪請限十日民間爭先輸納未卽期而數足一日巡行鄉間有於馬後議穀賤銀貴開徵期迫者大紳顧語之曰俟穀得價再輸未遲也語聞於大吏怒其擅自緩徵遣能吏代之民慮失大紳爭輸賦代者至已畢完大吏因責徵累年通久倘不足終以代者受事民益恐晝夜輸將不數日得三萬餘兩初大紳以忤上官意自劾求去民環署泣留相率走訴大吏適大吏有事泰山路見而諭止之不得去至是密自申請民知之已無及乃得引疾歸五十八年病起仍發山東補文登值新城修城大吏徇士民請檄大紳督工逾年始竣尋以曹縣舊獄被讓能職遣戍新城曹縣民爲捐金請贖得免歸嘉慶五年有密薦者詔以大紳操守廉潔兼有才能辦理城工渡船二事民情愛戴引見復發山東攝福山補朝城大水大紳以災報大吏駁減其分數民感大紳雖未獲減徵亦無怨謗者大紳又力以病求去移攝青州府同知尋擢武定府同知捕蝗查賑並著勞勩以母老終養歸遂不出卒祀名宦

祠大神素講學能文章在官公暇輒詣書院課士嘗訓諸生曰朱子小學爲作
聖階梯入德塗軌必讀此書身體力行庶幾明體達用有益於天下國家之大
於是士知實學風氣一變吳煥彩字蘊之福建安定人乾隆二十五年進士授
山東范縣知縣民苦充牌頭吏列多名進以次需索煥彩革其弊清河水溢爲
災其岸左高右卑因開五頃窪以瀉其東南築福金堤以防其西北歲得麥田
四萬畝墾地民苦納租欲請免而格於例代輸租之半教之種番粟民困乃紓
三十九年壽張逆匪王倫作亂距范縣四十里煥彩修城籌守禦力清保甲凡
村落大小人民賢愚可指數有孟興墜者與黃昌吉等有隙上變列三十餘人
朝命侍郎高樸與巡撫往察治使者山牒示煥彩曰某已死某爲某之父某之
子皆良民呼之即至使者欲以兵往煥彩曰兵至愚民非死即走無可訊咎將
誰執煥彩夜抵村中呼告之皆呼冤煥彩曰惟無其事必出就訊亟從我去不
然禍立至民皆裹糧從使者按籍少二人煥彩曰一已死一外出已命其兄招
之言未畢有跪門外者則已來矣訊之皆誣遂坐告變者巡撫曰知縣者知一

縣事君可謂之知縣矣知縣者民之父母君可謂之民之父母矣以卓異薦擢湖北鶴峯知州地本苗疆改流未久奸宄雜居煥彩動於聽訟積弊一清土司族裔每借祖墳詐入財懲治之澆風自息民樸陋不知書設義塾資以膏火至五十三年始有舉於鄉者後以病歸鶴峯請祀名宦范縣亦爲建生祠年逾八十卒紀大奎字慎齋江西臨川人乾隆四十四年舉人充四庫館磨錄五十年議叙知縣發山東署商河會李文功等倡邪教誘民爲亂訛言四起大奎集縣民諭以禍福皆驚悟鄰郡惑者聞之亦相率解散補邱縣歷署昌樂棲霞福山博平民皆敬而親之父憂歸嘉慶中復出授四川什邡縣或謂什邡俗強梗宜示以威答曰無德可懷徒以威示何益奸民吳中友據山中聚衆積粟講清涼教大奎躬率健役夜半擣其巢獲忠友餘衆驚散下令受邪書者三日繳予自新民遂安擢合州知州道光二年引疾歸年八十卒祀合州名宦邵希曾字魯齋浙江錢塘人乾隆五十四年舉人嘉慶中官河南知縣歷權通許盧氏鄆陵西華沈邱太康扶溝准寧新鄉皆有聲滑縣教匪之役司糧臺及匪平訊鞠俘

虜治餘匪凡良民被脅者皆得釋保全甚衆晚授桐柏民苦盜令村集建棚巡
更鄉數家出一人爲門夫有警環集無事歸業訪捕強暴者繩以法積匪率遠
徙慎於折獄皆速結訟日以稀朔望莅學集諸生講論增書院膏火親課之如
帥道光六年邑人王四杰始登進士第自明初以來所未有募錢萬緡建義學
凡經塾三蒙塾十五擇其秀者入書院肄業文教興而悍俗漸化在任十年民
安之老病大吏不令去卒於官